

প্রধানমন্ত্রীকে হত্যাচেষ্টা মামলায় মৃত্যুদণ্ডপ্রাপ্ত আসামি গ্রেফতার  
আত্মগোপনে ছিলেন ২২ বছর  
নিজস্ব প্রতিবেদক ২০ জুন ২০২২, ০১:৪১

গোপালগঞ্জের কোটালীপাড়ায় বোমা পুঁতে রেখে প্রধানমন্ত্রী শেখ হাসিনাকে হত্যাচেষ্টা মামলার মৃত্যুদণ্ডপ্রাপ্ত শেখ মো: এনামুল হককে (৫৩) গ্রেফতার করেছে র্যাব। গত শনিবার রাতে রাজধানীর তুরাগের দিয়াবাড়ি এলাকা থেকে তাকে গ্রেফতার করে র্যাব সদর দফতর গোয়েন্দা শাখা ও র্যাব-১ এর একটি দল। এ সময় তার কাছ থেকে ভিজিটিং কার্ড, ভুয়া জাতীয় পরিচয়পত্র, পাসপোর্ট ও দু'টি মোবাইল ফোন জব্দ করা হয় বলে দাবি করেছে সংস্থাটি।

র্যাব বলছে, ব্যবসায়িক সূত্রে নিষিদ্ধ উগ্রবাদী সংগঠন হুজির আমির মুফতি আব্দুল হান্নানের সাথে ঘনিষ্ঠতা ছিল এনামুল হকের। তার মালিকানাধীন ‘সোনার বাংলা কেমিক্যাল ইন্ডাস্ট্রিজ’ কারখানায় মুফতি হান্নান গোপন বৈঠক করেন এবং কোটালীপাড়ায় প্রধানমন্ত্রীর সভাস্থলে বোমা বিস্ফোরণের পরিকল্পনা করেন। ঘটনার পর দীর্ঘ ২২ বছর ধরে তিনি রাজধানীর উত্তরা, মোহাম্মদপুর, বনশ্রী ও গাজীপুরে নাম-পরিচয় ও পেশা পরিবর্তন করে আত্মগোপনে ছিলেন। পরিবর্তন করেছিলেন জাতীয় পরিচয়পত্রও।